

Les mâs d' Sints.

Gaston LUCY – Y.J.

On sét ku dins l' Ardène, ces cro.yances la nu sont nin rcounues p'âs des curés d'avå la.

Coumint k' des Sints, dins l'èsprit des djins, ont parvunu az awè coume in monopole dins la guèrison du yink û l' ôte des mâs k'aflidjint l'oume ?

Dju sondje tout bounmint ku c'est pasku les noms su rsan.nat fwârt (*homophonie*) C'est coume les Sints ki prèservat des flèyôs, coume la tounoûre, la grèle, les rats, evnn.

Cest insi ku Sint Cloud guèrit des clôs (*furoncles*). Sint Méen (*main*) et Sint Genou(?) s'ocupat des ces parties la du côrps., coume Sinte Clêre est mètuwe pou les oûys et la vue. Sint Ouen, c'est pou les orèyes (*ouïes*). Sint Mannès est réputé pou les mâs des seins (*mamma*) Sint Eutrope guèrit l'hydropisie et fwêt créchu les pwès (fât les samer l' djou dul fiêsse) ; Sint Josepj wête âs échalotes, k'on dèt planter lu 19 du mars, pou ostant k' i gn ûje pont d'èclipse du solê ç' djoû la. D'ayeurs, in djoû d'èclipse, on n' plante rin et on n' same rin., coume i n' fât jamwês ratèrer les canadas lu djoû dul Sint Pîre.

Sint Aignan est invoké cont la tin.gne. Sint Antoine du Padoue est connu pou rkèru les cayèts pièrdus. Et poukwè ? Pou dire Padoue, l'italyin dit : Padova et dins l' timps les cayèts pièrdus su l'oumint « èpaves ».

A walon, « djîrîes » vut dire : « folles imaginations ». Les cîs k'ont ça wèyat des monsses dul nute, et pou ça, on invoke Sint Jîle.

On pôrot co z-a raconter jusk' a dmwin, mès vôrot mî s' a rêfèrer a Sint Tacite, patron du silance.

Cand les vîs et surtout les vîes nu counichint nin l' Sint az invoker, ile pryint lu Sint k' c' ére, pa des côps a dustoûrant.

As pèlrinadjes, on fjot souvin trwâs côps l' tour du l'èglîje û dul tchapèle, a toûrant coume les aguwes d'ène monte ; si on dustoûrnot, on nn' alot contrêre.

Toutes ces pratikes la n'ont nin grand tchôse a vèy avu la rlijion. L'Eglîje nous propose des Sints et n' dusfind nin d' les invoker. C'est nin pou ça k' on plot invanter des sints coume, sint Furdin, pou les mâs d' dints.

A sint Furdin, on djot :

Grand Sint Furdin, dj'ê mâ les dints, dju n' s pupont mwindjî d' pwin. Et l'ôte ruspondot :
Eh bin ! mwindje yène du tes mwins, tu lèrès l' ôte pou dmwin !

Ène ôte sint co pus sbarant, c'est Sint Tapetula. On l' rucoumandot âs cîs ki s'plindint du l'odance (*fatigue*).

In' fârot nin rouviyî non pus lu garnd sint du crâs mârdis, Sint Pansô ku les gamins tchantint a racwèdant les ûs et les curtons .

Sint Pansô n' è nin soupé - Si vous vlèz bin lî a dner - Còpèz yôt, còpèz bas
Si vous n'oz pont d' coutê Dunèz lî tout l' boukèt.

Pou z-a ruvnu âs cro.yances, i fât bin dire ku cand onz è dandjî, i fât co souvint l' Bon Diu et tous les Sints pouz a rèchu !

Gaston LUCY